

聘定未婚之妻與人通姦本夫聞知徑捉將姦夫殺死之
案分別擬罪

刑部爲稟報事江西司案呈准廣西司傳抄本部奏前事
一案相應抄單行文江西巡撫一體遵照可也計粘單一
紙內開刑科抄出廣西巡撫官題龍州客民梁亞受與
黃寧嫗通姦被盧將捉姦毆傷身死一案緣盧將與梁亞
受素識無嫌梁亞受籍隸廣東向在龍州開烟舖生理盧
將自幼聘定同村黃勝登之女黃寧嫗爲室尚未成婚黃
勝登向與梁亞受交易往來其女黃寧嫗亦與熟識每因

趕墟之便常至梁亞受舖內閒談嬉笑乾隆三十四年四月初十日黃寧嫗至舖梁亞受調戲求姦黃寧嫗未允而散十二日梁亞受至黃寧嫗家適黃寧嫗父母外出梁亞受許給黃寧嫗銀鐲遂與成姦約于十九日送給至是日下午梁亞受以赴村買麥爲名至黃勝登家借宿黃勝登應允留食晚飯卽令在堂屋宿歇黃寧嫗因姦好情密將門虛掩等候梁亞受于黃勝登進房寢後卽推門進房與黃寧嫗姦宿詎盧將向見黃寧嫗與梁亞受來往懷疑未釋是日從黃勝登門首經過又見梁亞受在彼至晚復赴

窺探未回并探知留宿益加忿激隨起意捉姦歸告伊父盧文清盧文清以次日理論爲詞盧將恐事無憑據難以理斥俟盧文清睡後卽密赴伊母舅陸文生家告知情由邀令相帮陸文生應允盧將又往邀隣人趙弟趙囊并攜帶木棍一根陸文生等徒手隨行三更時分齊抵黃勝登欄房下盧將囑令陸文生等在欄下等候獨自帶棍上晒臺叫門黃勝登聞聲點燈啓視盧將進屋責問黃勝登未及回答黃寧嫗聽聞驚覺將梁亞受推醒梁亞受急起奔出房外盧將瞥見氣忿卽用棍向毆致傷梁亞受左額顱

黃勝登上前攔勸將燈帶滅梁亞受乘間逸出門外晒臺蹲身欲跳盧將隨後趕至恐其脫逃復舉棍毆傷梁亞受頂心梁亞受跌下晒臺并磕傷右額顱盧將亦即走下晒臺同陸文生將梁亞受擒獲盧文清聞聲趨視令盧將往報甲長盧將拉出黃寧嫗與梁亞受拴投甲長陳文隆陳文隆因深夜不能轉報頭人令將梁亞受等帶回俟天明送究至二十日早梁亞受因傷殞命據該管頭人報州通詳飭審茲據審擬詳解覆加研訊據盧將供認前情不諱詰無遁情查黃寧嫗雖係盧將聘定之妻究未過門婚配

律例內並無未婚之婿許其捉姦之文今盧將因捕捉未婚妻之姦夫致死未便照本夫捉姦致死姦夫科斷但梁亞受與黃寧嫗通姦既寔即屬罪人盧將捕捉時梁亞受並未抗拒輒用棍疊毆致死將盧將照罪人不拒捕而擅殺律擬絞監候黃寧嫗等擬以枷杖等因具

題前來查律載妻妾與人通姦本夫於姦所親獲姦夫姦婦登時殺死者勿論又定例姦夫已離姦所被本夫登時逐至門外殺之止依不應杖又姦夫已就拘執而毆殺或殺在姦所捉獲非登時而殺並須引夜無故入人家已就拘

執而擅殺至死律擬徒又捉姦已離姦所非登時殺死不拒捕姦夫者照罪人不拒捕及已就拘執而擅殺律擬絞監候各等語此案盧將聘定黃勝登之女黃寧嫖爲妻同村居住目擊客民梁亞受在寧嫖家走動住宿無忌乘夜往捉見梁亞受果從寧嫖房內走出用棍毆逐而傷拴投甲長梁亞受于次日殞命該撫因例內並無未婚之夫許其捉姦之文將盧將照罪人不拒捕而擅殺律擬絞查聘定已有夫婦之名姦情湏以捉獲爲據若本夫聞知伊聘定之妻與人通姦非當場現獲則事屬無憑控告既難白

之當官休棄又無以折服事族是未婚之夫聞姦往捉固出于勢之所不得已而亦爲情理之所應然倘姦夫業經脫逃或已擒獲輒復逞兇毆斃固難寬其擅殺之罪而事係登時毆由追逐若此等情節在應許捉姦之親屬尚得援照捉姦各條問擬而以聘定之夫竟同凡論殊失平允臣等悉心酌議本夫捉姦各條已屬周詳惟已經聘定尚未過門成親之妻本夫捉姦將姦夫殺死例無明文設遇此等案件外省問擬易致參差與其往返駁詰臨事更張莫若預定科條易于遵守請嗣後凡有一經聘定未婚之

妻與人通姦本夫聞知往捉將姦夫殺死審明姦情屬寔除已離姦所非登時殺死不拒捕姦夫者仍照例擬絞其登時殺死及登時逐至門外殺之者俱照本夫殺死已就拘執之姦夫引夜無故入人家已就拘執而擅殺律擬徒例擬徒其雖在姦所捉獲非登時殺者即照本夫殺死已就拘執之姦夫滿徒例加一等杖一百流二千里如姦夫逞兇拒捕爲本夫格殺照應捕之人擒拿罪人格聞至死者律得勿論如此辦理罪名既各有區別引斷亦更加詳密今此案盧將殺死未婚妻之姦夫梁亞受其通姦之

業據黃寧嫗並伊父黃勝登供認確鑿毫無疑義而用棍毆逐意圖擒獲適傷致斃核其情罪寔係登時逐至門外毆殺請將盧將改照本夫殺死已就拘執之姦夫引夜無故入人家已就拘執而擅殺律擬徒例杖一百徒三年如蒙俞允臣部載入例冊通行直省各督撫一體遵照辦理該撫疏稱黃寧嫗合依軍民相姦例枷號一個月杖一百折責四十板係犯姦之婦杖罪的決枷號收贖給黃勝登領回黃勝登雖無知情縱容情事但容留梁亞受在家住宿致與伊女通姦殊屬不合應照不應重律杖八十折責三十板

仍追原得盧將財禮聽其將女另嫁陸文生趙襄趙弟均係聽從盧將前往捉姦釀成人命俱照不應重律各杖八十折責三十板梁亞受許給黃寧嫖手鐲尚未交給應請免追梁亞受屍棺飭令開喚原籍屍親到案同遺物一并給領等語查陸文生趙襄趙弟係聽從盧將同往捉姦當盧將毆逐之時陸文生等並無助毆情事陸文生趙襄趙弟均免置議餘均應如該撫所題完結等因乾隆三十四年十二月初三日奏本日奉

旨依議欽此等因乾隆三十四年十二月三十日江省准咨

祖父母父母被殺子孫得財私和又收伯叔兄弟之妻者俱杖一百流三千里

刑部爲遵

旨議奏事江西司案呈准雲南司傳抄本部議覆雲南道監察御史成德奏稱查刑名案件斬絞重罪固宜詳慎研究而杖徒輕罪亦不得疎忽玩視若輕罪不儆則重罪易犯奴才查閱律例見律載祖父母父母爲人殺而子孫私和者徒三年又收伯叔及兄弟之妻者徒三年又豪勢之人以私債強奪人妻妾子女者徒一年半伏思父母天倫雖至